



25 Disyembre 2018

PASKO – Misa sa Araw

Taon K

ANG HIGIT SA INAASAM NA NAKALIPAS

Pinagdiriwang natin ngayon ang Araw ng Pasko ng Pagsilang ng Panginoong Hesukristo. Nagsimula ang misang ito sa pagdiriwang ng Santo Papa sa Araw ng Pagsilang ni Hesus sa Basilica ni San Pedro sa Roma. Ito ang kanyang ikatlong misa sa Pasko. Ang una ay ang Misa

sa Hatinggabi sa Basilica ng Santa Maria Mayor. Ang ikalawa ay ang Misa sa Bukang-Liwayway sa Basilica ni Santa Anastacia. Ang idinidiin sa Misa sa Araw ng Pasko ay ang Pagkakatawang-tao ng Anak ng Diyos. Ito ay ang pagtitirik ni Hesus ng kanyang Toldang Tirahan sa piling natin.



PASIMULA



Pambungad

(Ipahahayag lamang kung walang awiting nakahanda.)

Batang sa ati'y sumilang ay anak na ibinigay upang magharing lubusan, taglay ang dakilang ngalang Tagapayo ng Maykapal.

Pagbati

P–Ang pagpapala ng ating Panginoong Hesukristong nagkatawang-tao at nanirahan sa ating piling, ang pag-ibig ng Diyos Ama, at ang pakikipagkaisa ng Espiritu Santo ay sumainyong lahat!

B– At sumaiyo rin!

Pagsisisi

P–Paghandaan natin ang pagdiriwang na ito ng pagkakatawang-tao ng Panginoong Hesukristo.

Humingi tayo ng tawad para sa ating mga pagkukulang at nagawang pagkakasala. (Manahimik sandali.)

P–Para sa aming kawalan ng pananampalataya sa iyong dakilang balak para sa aming kaligtasan, Panginoon, kaawaan mo kami.

B–Panginoon, kaawaan mo kami!

P–Para sa aming kakulangan ng pag-asa sa biyayang-kaligtasang dulot ng iyong pagsilang, Kristo, kaawaan mo kami.

B–Kristo, kaawaan mo kami!

P–Para sa aming katabangan ng pag-ibig sa iyo at sa lahat ng taong ipinadala mo sa aming piling, Panginoon, kaawaan mo kami.

B–Panginoon, kaawaan mo kami!

P–Kaawaan tayo ng makapangyarihang Diyos, patawarin tayo sa ating mga sala, at patnubayan

tayo sa buhay na walang hanggan.
B– Amen!

Papuri

B–Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapatkat ikaw

lamang ang banal, ikaw lamang ang Panginoon, ikaw lamang, O He-sukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, sa iyong kagandahang-loob kami’y iyong nilikha, at sa iyong pagtatangkilik kami’y iyong pinadakila. Sa pagkakatawang-tao ng iyong Anak, kami’y iyong itinuring na hindi na iba sa iyo. Makapamuhay nawa kami bilang mga kapatid niya na totoong maipagkakapuri mo sa pamamagitan niya kasama ng Espiritu Santo magpasawalang hanggan.

B—Amen!

PAGPAPAHAYAG NG SALITA NG DIYOS



Unang Pagbasa Isa 52:7-10

Ang ating sipi mula kay Propeta Isaiaas ay naglalahad ng pag-susugo ng Diyos ng magdadala sa daigdig ng magandang balita ng kapayapaan at kaligtasan. Dakilang saya ang kanyang dala. Ang buong bayan ay hinihimok na umawit sa galak. Magalak nawa tayo nang lubos sa pagsilang ng Panginoong Hesukristo.

L—Pagpapahayag mula sa Aklat ni Propeta Isaiaas

Magmula sa bundok, O kay gan-dang masdan ng sugong dumarating upang ipahayag ang magandang balita ng kapayapaan. Ipapahayag niya ang tagumpay at sasabihin: “Sion, ang Diyos mo ay hari.”

Narito! Sisigaw ang nagbabantay, dahilan sa galak, sama-sama silang aawit; makikita nila ang Panginoon sa Sion ay babalik, magsiawit kayo, mga guhong muog nitong Jerusalem; pagkat ang hinirang ng Diyos na Panginoon ay kanyang inalaw, tinubos na niya itong Jerusalem. Sa lahat ng bansa, ang kamay ng Poon na tanda ng lakas ay makikita ng mga nilalang, at ang pagliligtas nitong ating Diyos tiyak na mahahayag.

Ang Salita ng Diyos!

B—Salamat sa Diyos!

Salmong Tugunan Awit 97

B—Kahit saa’y namamalas, tagumpay ng Nagliligtas!

R. M. Velez



Ka-hit sa-a'y na-na-ma-las, ta-



gumpay ng Nag-li-lig-tas!

* **Umawit ng bagong awit at sa Poon ay ilalay, pagkat yaong ginawa n’ya ay kahanga-hangang tunay! Sa sariling lakas niya at taglay na kabanalan, walang hirap na natamo yaong hangad na tagumpay. B.**

* **Ang tagumpay niyang ito’y siya na rin ang naghayag, sa harap ng mga bansa’y nahayag ang pagliligtas. Ang pangako sa Israel lubos niyang tinutupad. B.**

* **Tapat siya sa kanila at ang pag-ibig ay wagas. Ang tagumpay ng ating Diyos kahit saan ay namalas! Magkaingay na may galak, yaong lahat sa daigdig; ang Poon ay buong galak na purihin sa pag-awit! B.**

* **Sa saliw ng mga lira iparinig yaong tugtog, at ang Poon ay purihin ng tugtuging maalindog. Tugtugin din ang trompeta na kasaliw ang tambuli, magkaingay sa harapan ng Poon na ating hari. B.**

Ikalawang Pagbasa Heb 1:1-6

Ang Sulat sa mga Hebreo ay galing sa isang pantas na taga-Alexandria sa Egipto. Siya ay kinasihan ng Espiritu Santo upang tulungan ang ikalawang salinlahi ng mga Kristiyanong ang mga ninuno ay mga Hebreo. Ang ilan sa kanila ay nag-aalinlangan kung tama ba ang kanilang ginawang iwan ang Lumang Tipan at sumampalataya kay Kristo. Itinuturo ng ating siping si Kristo ay higit sa lahat ng mga Propeta sa Lumang Tipan dahil siya ang nagpapamalas ng Ama.

L—Pagpapahayag mula sa Sulat sa mga Hebreo

Mga kapatid: Noong una, nagsalita ang Diyos sa ating mga ninuno sa iba’t ibang panahon at sa iba’t ibang paraan sa pamamagitan ng mga propeta. Ngunit ngayon, siya’y nagsalita sa atin sa pamamagitan ng kanyang Anak. Sa pamamagitan ng Anak ay nilikha ng Diyos ang sansinukob at siya ang itinalaga niyang magmay-ari ng lahat ng bagay. Ang Anak ang maningning na

sinag ng Diyos, sapagkat kung ano ang Diyos ay gayon din ang Anak. Siya ang nag-iingat sa sansinukob sa pamamagitan ng kanyang makapangyarihang salita. Pagkatapos niyang linisin tayo sa ating mga kasalanan, siya’y lumuklok sa kanan ng Diyos, ang makapangyarihan sa lahat. At kung paanong higit na dihamak ang pangalang ibinigay ng Diyos sa Anak, gayon din, siya’y higit na dihamak sa mga anghel.

Sapagkat hindi kailanman sinabi ng Diyos sa sinumang anghel, “Ikaw ang aking Anak! Ako ang iyong Ama.” Ni hindi rin niya sinabi sa kaninuman sa mga anghel, “Ako’y magiging kanyang Ama, at siya’y magiging Anak ko.” At nang susuguin na ng Diyos ang kanyang bugtong na Anak sa sanlibutan ay sinabi niya, “Dapat siyang sambahin ng lahat ng anghel ng Diyos.”

Ang Salita ng Diyos!

B—Salamat sa Diyos!

Aleluya

B—Aleluya! Aleluya!

Banal na araw sumikat; halina’t sumambang lahat sa nanaog na liwanag. Aleluya! Aleluya!

Mabuting Balita Jn 1:1-18

Ang ating sipi ay ang Panimula ng Ebanghelyo ni Juan. Iniuugnay nito ang pagkakatawang-tao ng Anak ng Diyos sa paglikha ng Diyos ng sanlibutan sa Aklat ng Genesis. Ito ay ang pagpapani-bago sa nilikha ng Diyos at ang pagsasaayos sa lahat ng kaguluhang naganap sa daigdig.

P—Ang Mabuting Balita ng Panginoon ayon kay San Juan
B—Papuri sa iyo, Panginoon!

Sa pasimula pa’y naroon na ang Salita. Kasama ng Diyos ang Salita at ang Salita ay Diyos. Kasama na siya ng Diyos sa pasimula pa. Sa pamamagitan niya nilikha ang lahat ng bagay, at walang anumang nalikha nang hindi sa pamamagitan niya. Mula sa kanya ang buhay, at ang buhay ay siyang ilaw ng sangkatauhan. Nagliliwanag sa kadiliman ang ilaw, at hindi ito kailanman nagapi ng kadiliman.

Sinugo ng Diyos ang isang tao na nagngangalang Juan. Naparito siya upang magpatotoo tungkol sa ilaw at manalig sa ilaw ang lahat dahil sa patotoo niya. Hindi siya ang ilaw kundi naparito siya upang magpa-

totoo tungkol sa ilaw. Ang tunay na ilaw na tumatanglaw sa lahat ng tao ay dumarating sa sanlibutan.

Nasa sanlibutan ang Salita. Nilikha ang sanlibutan sa pamamagitan niya ngunit hindi siya nakilala ng sanlibutan. Naparito siya sa kanyang bayan ngunit hindi siya tinanggap ng kanyang mga kababayan. Ngunit ang lahat ng tumanggap at nanalig sa kanya ay pinagkalooban niya ng karapatang maging anak ng Diyos. Sila nga'y naging anak ng Diyos, hindi dahil sa isinilang sila ayon sa kalikasan, ni sa pita ng laman o sa kagagawan ng tao. Ang pagiging anak nila ay buhat sa Diyos.

Naging tao ang Salita at siya'y nanirahan sa piling natin. Nakita namin ang kanyang kapangyarihan at kadakilaan, puspos ng pag-ibig at katapatan. Tinanggap niya mula sa Ama ang kapangyarihan at kadakilaang ito bilang bugtong na Anak. Nagpatotoo si Juan tungkol sa kanya. At ganito ang kanyang sigaw, "Siya ang tinutukoy ko nang aking sabihin, 'Ang darating na kasunod ko'y higit sa akin, sapagkat siya'y siya na bago pa ako ipanganak.'"

Dahil sa siya'y puspos ng pag-ibig, tayong lahat ay tumanggap mula sa kanya ng abut-abot na kaloob. Sapagkat ibinigay ang Kautusan sa pamamagitan ni Moises ngunit ang pag-ibig at ang katotohanan ay dumating sa pamamagitan ni Hesukristo. Kailanma'y walang nakakita sa Diyos, subalit ipinakilala siya ng bugtong na Anak – siya'y Diyos – na lubos na minamahal ng Ama.

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkatawang-tao siya (*Lumuhod sandali.*) lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan

sa lahat. Doon magmumulang paririto at hukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Hangad nating maging maka-buluhan ang Paskong ito para sa atin, sa ating mga mahal sa buhay, at sa ating bayan. Idulog natin sa Diyos ang ating mga kahilingan at sambitin:

B–Amang nagsugo ng Anak para sa aming kaligtasan, dinggin Mo ang aming panalangin!

* Para sa mga namumuno sa Simbahan, upang sa Paskong ito ay matulungan nila ang Bayan ng Diyos na mahanap sa Bagong-Silang na Sanggol ang kanilang kaganapan, manalangin tayo sa Panginoon. **B.**

* Para sa lahat ng mga kabataan, upang sa taong ito ng mga kabataan ay mahanap nila sa Bagong-Silang na Sanggol ang lihim ng maaliwalas na hinaharap at makabuluhang buhay, manalangin tayo sa Panginoon. **B.**

* Para sa mga namumuno sa ating bansa, upang mabigyan nila ang mga taong-bayan ng matibay na pag-asa sa isang bukas na mapayapa at puno ng magandang pagkakataon dahil sa Bagong-Silang na Sanggol, manalangin tayo sa Panginoon. **B.**

* Para sa mga taong naghahangad na madala ang diwa ng Bagong-Silang na Sanggol sa buhay ng iba, upang magtagumpay at lumigaya sila sa kanilang ginagawa, manalangin tayo sa Panginoon. **B.**

* Para sa ating lahat na nagkakatipon sa Paskong ito, upang mahanap natin sa Bagong-Silang na Sanggol ang katuparan ng ating mga nilulunggati at pinapangarap, manalangin tayo sa Panginoon. **B.**

* Tahimik nating ipanalangin ang ating mga pansariling kahilingan. (*Tumahimik sandali.*)

Manalangin tayo! **B.**

P–Ama naming puno ng karunungan at kabaitan, isinugo Mo sa amin ang Iyong Bugtong na Anak sa anyo ng isang mahinang Sanggol. Ipadala Mo sa amin ang Iyong Banal na Espiritu upang gabayan kami sa pagtahak sa landas ng pagbibigay ng sarili sa ikapapanuto ng iba, alinsunod sa halimbawa ni Hesukristong aming Panginoon.

B–Amen!

PAGDIRIWANG NG HULING HAPUNAN



P–Manalangin kayo . . .

B–Tanggapin nawa ng Panginoon itong paghahain sa iyong mga kamay, sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P–Ama naming Lumikha, ang paghahaing ito ngayong dakilang kapistahan ng Pasko ng Pagsilang ng iyong Anak ay iyong kalugdan bilang ganap na pagsamba at lubusang pakikipagkasundo namin sa iyo sa pamamagitan niya kasama ng Espiritu Santo magpasawalang hanggan.

B–Amen!

Prepasyo ng Pasko II

P–Ama naming makapangyarihan, tunay ngang marapat na ikaw ay aming pasalamat sa pamamagitan ni Hesukristo na aming Panginoon.

Dating lingid sa ami'y naging hayag na kapiling. Dating kapiling mong ngayo'y naging kapwa namin. Sa amin ay nakikisama siyang mabuti upang sa piling mo ay maitampok niya kami. Ang sangkatauhang nawalay sa iyo noon ay kanyang ipinipisang muli sa iyo ngayon upang ang napinsala noong sanlibutan ay magkaroon ngayon ng bagong kaayusan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B–Santo, santo, santo . . .

Pagbubunyi

B– Aming ipinahahayag na namatay ang 'yong Anak, nabuhay

bilang Mesiyas at magbabalik sa wakas para mahayag sa lahat.



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinasabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinasabang

(Ipahahayag lamang kung walang awiting nakahanda.)

Nahayag sa sanlibutan at malas kahit saan dito sa lupang

ibabaw ang kaligtasa't tagumpay ng Panginoong Maykapal.

Panalangin Pagkakinabang

P– Ama naming mapagmahal, ipagkaloob mong ang sumilang ngayong Tagapagligtas na nagdulot sa amin ng muling pagsilang sa iyong angkan ay siya rin nawang magkaloob ng muling pagkabuhay kasama mo at ng Espiritu Santo magpasawalang hanggan.

B– Amen!



P– Sumainyo ang Panginoon.

B– At sumaiyo rin!

P– Magsiyuko kayo habang iginagawad ang pagbabasbas. (Tumahimik sandali.)

Nang siya'y naparito bilang tao, pinawi ng Anak ng Diyos ang kadiliman sa sanlibutan, at binihisan ang banal na araw na ito ng kanyang kaluwalhatian. Nawa'y pawiin ng Diyos ng walang hanggang kabaitan

ang kadiliman ng kasalanan at liwanagan ang inyong mga puso.

B– Amen!

P– Isinugo ng Diyos ang Kanyang mga anghel sa mga pastol upang ibalita ang malaking kagalakan sa pagsilang ng Tagapagligtas. Nawa magtamo kayo ng galak at kayo'y maging mga tagapagbalita ng Kanyang Ebanghelyo.

B– Amen!

P– Nang magkatawang-*tao* ang Salita, inilapit ang sanlibutan sa langit. Nawa pagkalooban niya kayo ng kanyang kapayapaan, mabuting kalooban, at pakikisama ng lahat ng nasa langit.

B– Amen!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Humayo kayo at ibahagi ang kagalakan ng Pasko sa lahat.

B– Salamat sa Diyos!

Ang Pagbabalik Inaasam na Nakalipas

Noong naglalakbay pa lamang nang mga Israelita sa ilang patungo sa lupang ipinangako sa kanila ng Diyos ay talagang malapit Siya sa kanila. Ninais ng Panginoon manirahan sa isang Toldang itinirik ng mga Israelita sa kanilang piling. Ito ay hinuhugot kapag sila ay maglalakbay. Ito ay itinitirik kapag sila ay titigil sa isang lugar. Dahil dito ay itinuring nila ang Diyos na kanilang kalakbay, na kanilang lagging kasama sa daan, na talagang malapit sa kanila.

Ang lahat ng ito ay nagbago noong maitayo na sa Jerusalem ang Templo sa panahon ni Haring Solomon. Ang Templo ay isang dakilang gusaling kahanga-hanga sa paningin. Subalit ito ay nagparamdam sa mga Israelitang may naiba

sa pakikitungo ng Diyos sa kanila. Siya ay hindi na tulad ng dating madaling lapitan. Parang naging malayo na Siya sa kanila, walang kaugnayan sa kanilang mga pang-araw-araw na pangangailangan. Ang Panginoon ay ang Dakilang Diyos na hindi kayang abutin ng mga tao.

Marami sa kanila ang naghanged na sana'y manumbalik ang dating pagiging malapit ng Diyos sa kanila. Nilulungati nilang bumalik ang panahong ang Diyos ay tumitira sa Tolda at napakadaling lapitan. Ang pagkatawang-*tao* ng Anak ng Diyos ay ang katugunan sa ganitong paghahangad. Ang sabi nga ni San Juan: **“Naging tao ang Salita at siya'y nanirahan sa piling natin”** (Juan 1:14). Sa orihinal na Griego ay ganito ang isinasaad: **“kai ho logos sarx egeneto, kai es-**

kenosen en hemin.” (At ang salita laman naging, at nagtirik ng tolda sa piling natin.) Sa madaling sabi, ang pagkatawang-*tao* ng Salita, ang Anak ng Diyos, ay inihalintulad sa pagtitirik ng Toldang Tirahan ng Panginoon sa piling natin. Ito ay ang pagbabalik ng dating pagiging malapit ng Diyos sa Kanyang bayan.

Sa Pasko ng Pagsilang ni Hesus ay ipinagsasaya natin ang pagiging malapit na naman sa atin ng Diyos. Lumapit Siya sa atin dahil hindi naman natin kakayaning lumapit sa Kaniya kung hindi Siya bababa at makikisama sa atin. Kaya kung malalayo tayo sa Kaniya ay dahil sa ating sariling kagagawan. Sana'y maturuan tayo sa Paskong itong lagging magsikap na manatiling malapit sa Diyos na nagtirik ng Kanyang Toldang Tirahan sa piling natin.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• Illustrations: A. Sarmiento, B. Cleofe • Marketing: Fr. B. Nolasco and T. Mojica • Circulation: R. Saldua